

止充飢而無味所以一切山林屋舍舟船車舉等彼四類見之種種各別又云恒河中水人見則分明是波浪業重之鬼見之顛倒以為煙焰矣又舊記雷書有三種鬼因皆是凡夫所犯殺後料揀罪狀當入此數一是輓運雨澤謂運水逆升虛空助龍行雨二者捷汲溟波俗謂之推潮鬼三者伐薪煮泉諸處湯泉是也以人觀之則云雨自天降潮是海涌湯泉是土地所出那有許多事而冥冥中所見如此今夫鐵柱

當湧出地時

都仙宴息真淨妙明境中不過微作念耳蓋成道護生時節因緣應如是也此即關尹子所謂道無鬼神獨往獨來的境界今此教中謂之深造真淨妙明之心學若凡夫肉眼當時自見有許多鬼工現前鈴槌鐘鞀靡所不有若業龍蛟蜃之類則當時自見有鐵柱鐵鎖制伏拘束彌密牢固畏懼退縮略不敢動作矣無他只是有道之士心境虛明微妙所見自然輕清無許多

繁擾龐重縱有所作皆神動天隨不過性海中一浮漚發耳若凡夫蛟蜃輩業力濃厚所見自然龐重惡濁便有許多境界現前所以上聖高真往往指此輩為妄見妄聽之徒如此則人間相傳安得而不為圖畫哉

淨明忠孝全書卷之六

正一天師清微弟子百堅製作
道教學術資訊網站

太玄真一本際妙經

付囑品

毋一

元始天尊時在協晨靈觀峻嶒之臺與太上道君及十二億萬高真上聖俱坐白玉獅子之座具宣秘要開闡妙門自非天尊同業共行入道界人不預斯集是時天尊即放五色微妙光明遍照十方一切國土光中演出種種類音各隨風俗聞者皆解宣說諸法悉是无常苦惱穢惡无自在者須臾變滅猶如夢幻汝等咸應生厭離想雖復神仙壽億萬劫終必死壞三清衆聖念念无常是故世間无可保者

元始天尊為汝等故權應見身教導汝等並得開度諸未度者為後世因緣功成事遂誓願剋滿今當反神還手无為湛寂常恒不動之處汝等若有疑網之心恣來啓問當為演說是吾最後委訣之辭宜各及時勿懷憂悔復以神力震動大地周回旋轉驚駭物心當爾之日三惡衆生皆得休服人天之報各蒙增益无諸苦惱障難之事莫不一時遠近俱

集其衆无量不可勝言是時大衆咸同一心
 瞻仰道君目不暫瞬悲止慟而說偈言
 元始无上天人師 今捨大慈離生死
 獨反善寂妙一源 不住世間濛塵滓
 眞智冥淨无礙身 譬喻言辭莫能擬
 非是我等所知見 何能觀之悟玄理
 我等始發上乘心 猶如初生小犢子
 唯願應身大慈悲 法乳飲餒成壯齒
 天尊應現无比身 一切舍生所恃恃
 云何一旦棄本誓 世間孤露失依止
 善哉世眼大道君 了達真應无終始
 願爲勸請元始尊 覆護衆生如父子
 太上道君爲衆生故從座而起稽首天尊唯
 願大哀愍傷一切久留妙應常在世間教導
 利益使得成就威蒙啓度普入法門
 元始天尊大慈悲心答道君曰乃能愛念一
 切舍生隨順世間請我住世道君當語此衆
 之中未入定者自我得道已來經无量劫常
 在世間未曾捨離若應度者恒見我身運會
 遷移則不能見此劫衆生機宜所感當由道

君而得度脫是故我今昇玄入妙汝等肉眼
 不見我真實之身謂言滅盡但修正觀自當
 見我與今无異若於空相未能明審猶憑圖
 像像錄其心富鑄紫金寫我真相禮拜供養
 如對眞形想念丹禱功德齊等所以者何身
 之與像俱非實故若能明了非身之身圖像
 眞形理亦无二是故敬像隨心獲福報之輕
 重唯在汝心貧窮之人泥木銅綵隨力能辦
 殿堂帳座幡華燈燭稱力供養如事我身永
 此因緣終歸正道必當與我期在大羅復告
 道君若諸大衆有疑未了隨意問難當助教
 誨令速悟解勿使失時
 太上道君舉手告衆我奉天尊善慈教勅令
 使汝等決所未悟宜知是事
 爾時太極法師真人徐來勒於大衆中從座
 而起到太上前長跪啓曰臣以有幸預接尊
 顏加見訓示三寶洞極位忝上眞法師之任
 過泰屏營未可爲喻今奉告命上問天尊誠
 非愚訥所能啓請然臣既任法師方宣正道
 兼蒙教令不敢感情輒欲諮問唯願弘慈指

誨可不進退之儀伏惟誠示
 太上道君告來勒曰汝積功累德致上聖顯
 微作大法師開導後學有疑請訣正是其人
 爾時來勒斂容正服安庠雅步於大衆中猶
 如獅子梅檀林從容无畏承道君旨往詣
 天尊五體投地叉手作禮悲感涕淚上白天
 尊向於光中已奉告命重被道君上宣勸督
 不揆愚淺輒欲諮問唯願大慈必賜哀許於
 是
 天尊歡喜答曰善哉善哉欲有所問甚得機
 宜汝今善聽譬如國王統領天下具足七寶
 種種庫藏是王有時巡行四海以自娛樂普
 益民黎儲君承統紹宣洪業加以委寄有智
 大臣讚揚正治利安臣民我亦如是運御一
 切爲大法王欲巡至妙昇玄之域以正觀心
 導三清衆悉以正眞秘密寶藏委付道君拯
 卹貧窮无善財者班錫功勳精進之人復欲
 普令諸眞大聖共弘正道隨機所稱各開利
 益亦如國王所付之臣必選深智堪委寄者
 然後付之汝亦如是人於无量微塵之劫捨

欲守真精進勇猛智慧明了福德裏修故能發心誦論大法我以圓足具福慧故善能釋汝疑惑之心知汝堪受甚深祕藏輔助道君弘道利物於是太極真人白

天尊曰敢問季世正法流行所說言辭隨從世典天魔異道添雜真經語以義乖云何分別願示其要使將來世无留礙心

天尊告曰道本无言亦无文字但為世間无明衆生愚癡觸壁聽心冥道无由解悟故立世典漸啓童蒙乃寄語言宣示正道假借文字著述經圖語字乃同非復流俗子欲識者當一心聽有十二印我正法若諸教中有此法印即是正經无此印者即是邪說何等十二一者世間有為之法皆悉无常即生即變即老即滅逝水電光駿馬騰風莫之能比諸天壽限期滿亦謝隨業流傳三惡道中大期死壞易可知覺變易无常世不能了三清之人見生滅相覺无常苦智明了故體无相故以智慧故能知能覺忘不著故不以為苦而是任放恬愉安樂解未圓故隨念生滅二

者一切世法皆无有我不自在故非真實故相因待故三者世間有心之法皆悉苦惱何以故可逼迫故可違逆故无常遷滅故苦有二種一麤二細云何為麤一切受生老病死壞怨家會恩愛分離所求不稱是名麤苦

云何細苦即細无常念念損壞實是苦惱人不能知是名細苦四者一切世間不淨穢惡亦有麤細穢者可見細不可知如世肉身皮膚血脉大小不淨屍形臭爛是麤不淨煩惱結漏慧者兼薄是細不淨五者萬物皆是空无性无真實故假象緣故六者出世昇玄至道常住湛體自然无生无滅離有為相七者一切妙智自在无礙神力所為隨意能辦故名大我八者離二无常不受諸愛心想寂滅故名安樂九者真性靈通離一切相无染无穢是名清淨十者至道真實非偽雜身是金剛身故名善有十一者是世間法及出世法皆假施設悉是因緣開方便道為化衆生强立名字十二者正道真性不生不滅非有非无名正中道十二法印定我法門隨有其言

即宜遵奉无此說者不可修行吾以道眼遙於寂地觀察衆生有能分別明了法印依法行者我即化身種種示現人天六道隨宜施作儻有欵无勸示接引覆護輔持令无留難卿當以此法印普教天人咸使知識案法奉行太極真人稽首奉命

天真人避席稽首上白

天尊我於今日欲有所問唯垂聽許

天尊告曰善哉善哉然隨所問

皇人啓曰不審初學未入定位何所修習以為階梯

天尊曰善哉皇人乃能為諸未悟衆生作如是問凡世男女當得其恩夫為學者初修十事以為階梯如人緣梯從初一梯至第二梯乃至於頂昇階亦爾自下之高要須先習此十行法然後乃能深入正觀何等為十一生善欲有欲樂心乃能進取二近善友遇善友故引導其心深信正道三造明師師有妙法廣能宣告示以要術四聞正教能受讀誦五能出家常行柔弱以固身命永斷有為離錯

桎梏六受正戒防身口心七隱山林栖遯獨
處水離塵修寂靜志八念大道真是法王
能度眾生越生死海猶如船師拯濟沈溺九
念經教是妙醫方能示眾生治煩惱藥十念
法師是真父母善能生我法身慧命因是十
法能令行人增進正解入決定位如陟階梯
至于極頂

皇人又問云何名為修習正觀登頂之相
天尊答曰始學之人精修十行為方便道學
相似空能解眾生无真實體漸悟微塵亦无
真性悉皆虛假入一相門堅固不退是名登
頂如上高山至頂得住而无退墮知不退已
進更修習轉得勝明能生真道力用增益似
於无欲體滯著故故名為似入真法門故名
无欲甚深正教能通眾生入无欲道復名法
門无欲增長洞解真性正見諸法无生滅相
轉出生死破諸魔眾心如琉璃映徹无闕正
中之正畢竟永斷名轉法輪法輪之體是真
寶智運出三界超踰玉清到常寂處故名法
輪是諸神尊得是法已復欲令汝諸眾生等

乘此正智出到道場方便善巧如所悟說因
此巧說今得開曉轉暗入明由此妙教是故
復名為正法輪如車有輪能運乘者隨意所
至到安樂處是正法輪亦復如是能載行者
到解脫處又如國王有大寶輪能破怨敵是
法如是能破四魔異道怨敵是故復名正法
輪也是名修習正解正觀登頂之相

皇人復問若諸大士於惡濁世欲教眾生先
以何法而成熟之願垂告誨得兼利益
天尊告曰譬如良醫善知治術然後乃能治
一切病如此經者即世良醫能示眾生治煩
惱藥病之要術所以者何未見此經不識眾
生造惡根源顛倒病相又不能知治斷之術
如遇癡人身嬰重病不遇良醫隨心自服諸
飲毒藥病既不愈橫夭其壽始學之人不遇
此經亦復如是暗習邪道以自救度既不得
度墮三惡道是故應當聽受是經識醫良術
乃能療諸妄惑之病遇度神仙云何為術行
者欲度一切眾生先當入定察其緣起樂欲
根性差別若干貪欲偏重脫身无寄不淨具

穢諸惡充滿破其深愛念想之心瞋恚多者
示四等行使學慈仁忘我愛物解其忿對令
无怨惱愚癡重障示以法門方便教誨令得
慧解散亂之人示令守一拘魂制魄專柔其
心學嬰兒行者諸見者示以空相泯其分別
計畫之心多憍慢者示无我相无自在力何
所恃怙而起高心不久磨滅終必死壞苦惱
逼迫无暫安時以无常苦通治諸病常念正
道等療眾病是名成熟眾生之相既成熟已
堪任為說重玄兼忘平等正法入真實際是

名大乘教化之術此經如是示善持法是故
我說喻如良醫得此經者能識眾生病所徧
病及以等病隨宜投藥无不差愈如此人者
亦名醫王依此經故能消眾惱是故復稱為
智慧藥能生智慧離煩惱病故名慧藥卿等
當知名義无量或說因為果或說果為因如
說教法為慧藥者是名因中而受果稱何以
故能愈病者乃名為藥是智慧藥從正教生
是故正教名為慧藥此經非但能治惑病亦
能發生妙善之法能使學者到常樂處不死

之官譬如甘露有服之者終無橫死長命延年此經如是有服行者必得常恒安樂之命若有不能善巧方便學一向作解而起執滯更增煩惱不保長生譬如有人雖服甘露不能將節傷損藥性反致毒傷是故應當於正法門深解方便隨宜取悟證甘露道是乃名為得法利益

呈人作禮稱善復座

上相青童君內自思惟

天尊所記十種階梯為始學者入道方便如是之相我尚未了初發意者豈能解耶作是念已從座而起嚴整衣冠一心庠序到

天尊前禮畢長跪白

天尊曰向聞十法為行階梯愚未能解願重

告示云何名為善欲之心

天尊曰善哉上相問有二種一者狐疑未解故問二為一切未解者向上相已於久遠劫來善解妙門通達正法已入道界沐浴法流並觀空有善知廣略說法之要為眾生故方便啟請夫說法者有二種相一略二廣為鈍

根者亦略亦廣但開一門故名為略若多說者智不堪故於一事中分別說故名之為廣以其難悟指掌難數故名為廣為利根者亦有廣略備開法門是名為廣智力堪故不須曲碎而能具解粗釋一隅故名為略我為皇

人處中為說初學下根理所未究上相慈愍為來世人啟請分別今當廣示言善欲者承宿習因自然而發信敬之念願樂三寶欲求出世厭惡世間一切眾生凡所為作皆因欲生若欲行善則能趣善欲行惡者便造惡事是欲所本由根鈍利福果之人稟悉純和其根利故能生善欲鈍根罪報受悉濁辱其根闇鈍則生惡欲習欲增積成性不移是名分別善欲之相

青童君曰云何復名近於善友

天尊曰友亦二種有敗有成若人勸言人生受報任命自然數盡則終非關習業如刺頭尖火燥水濕誰之所為凡聖愚智貴賤貧富誰作之者但當守分達其所稟從容自足何須苦行求學善法矯性自傷勞而无獲尚无

見益何道之有作此說者名惡知識不可親近宜即遠離若有說言一切果報由業緣來內眼不觀三世報相謂言自然此非實義汝勿信之當發善志尋師問道修行正教為來生緣轉入信根成无上道如是說者名善知識如是之人常應親近何以故是能生成法身命故能生二世福利樂故

青童君曰始聞善友利益之相云何名為造事明師

天尊曰師有二種一華二實所言華者內无所解外見解相光飾誑物令使信從是名愚師不可歸依所言實者內解備故行无缺故衣弊履穿謙光晦迹外若不肖名大丈夫若因善友識此師者宜往服勤諮稟嚴訓若說小乘有得之義生滅相法有有有有因有果說如是等名為暗師若說諸法无修无得无滅无生非有非无非因果果而有而无非不因果巧解因緣假名中道示教是法乃名明師

青童君曰如是大師甚為希有云何名為出

家之相

天尊曰夫出家者義趣甚深利益弘遠家有二種一者恩愛二者諸有姑學之人既值明師志能勤苦執事奉承餐受妙訓若在居家父母妻子愛累自纏如處囹圄不得自在適志從容遠近隨師詢請玄業故求父母請別妻子捨離居室遠遊山林依憑精舍素俗服玩黃褐玄巾捨世榮華唯道是務是名初出恩愛之家既出家已勤行齋戒克離三塗信根已立學靜入空離三界愛登九清是名出離諸有之家是名出家

青童君曰我今乃離三惡道家願得出離諸有家也不審何者名為正教

天尊曰若有經文具十二印應三洞者是名正經自此之外皆名邪法不可受持當自請師審定分別

青童君曰云何名戒

天尊曰戒有二種一者有得二者无得有得戒者三戒五戒八戒九戒十戒二十七戒百八十戒三百大戒止惡防非未達方便名有

得戒出離三塗及人中苦未入道分若識諸法畢竟空寂是名正戒无持无犯關正觀門為道根本

青童君曰云何名為隱處山林

天尊曰是亦二種下士小心常畏諸塵之所深汙故入巖草林藪之間避諸穢惡靜然端拱修寂滅行上士在世不畏塵勞雖居世間无所深汙猶如珠如玉體性明淨處智慧山依无相野是名善解山栖之相

青童君曰云何名為念道之相

天尊曰夫念道者道能制滅一切惡根猶金剛刀无所不斷猶如猛火无所不燒念有二種一念生身七十二相八十一好具足微妙人中天上三界特尊是我歸依覆護之處一念法身猶如虛空圓滿清淨即是真道亦名道身亦名道性常以正念不問餘心是名念道

青童君曰請事要言云何復名念經之相

天尊曰經有三種大乘小乘及以中乘係心受持常生信慕存想不移審知是法是出世

道无他雜念是名念經若知諸法本无文字正觀實相達其旨趣亦名念經是名善解念經之相

青童君曰云何念師

天尊曰師者父也我若无師不能得道是故應當遠近隨逐心眼觀想恒在目前不替須臾无他雜想是名念師又當正念一切得道大聖眾真通是師寶皆能訓我是良福田係念歸依心心相續邪念不起是名念師

青童君曰始家開明諸疑永斷來生男女无復疑惑禮拜畢已依位而坐

元始天尊抗手告眾汝等當知我之真身清淨无礙猶如虛空不生不滅常住善寂大智慧源雖復窈冥其精甚信无量劫來證此真體恒安不動超絕无倫非聖所知非凡所解為眾生故應見受身遊入五道稱緣開度隨宜方便皆使悟入應物根性權示色像故名應身而此應身亦无生滅无有去來常住不變為利一切隱顯不同發起精進令无退轉諸所應作皆已畢訖所未應行道君白了汝

諸大衆宜共奉承勿於我所生分別念作是語已即有飛雲丹霄八景玉輿幢幡寶蓋徧滿虛空天灑香花神龍伎樂俄頃之間一時同至

天尊於是即登玉輿冉冉昇空大衆極目不復能觀是時衆仙哽咽號慕如失父母仰空作禮拜拜道君而說偈曰

无上淨妙真智身 寂滅无相莫能親

但見應身還本源 是故各懷大憂苦

仰賴太上无極尊 猶如失母依慈父

我等沒在憂火中 唯願時靈甘露雨

斷絕倒相戀著心 消除諸見滅邪趣

太上道君告四座曰汝等當知一切諸法皆

空寂相生死道場性无差別不應妄生去來

之想若始發意當識无常各求自度離生死

苦

天尊遣教戒勸分明努力勤修早求解脫勿

懷憂惱虛喪善功說是語已即與侍從還返

玉京諸餘神仙十方來者各禮道君一時而

退

太玄真一本際妙經

正一天師清微弟子 洪百堅 製作

道教學術資訊網站

二經同卷

太上洞玄靈寶八仙王教誡經

太上洞玄靈寶國王行道經

母三

洞玄靈寶八仙王教誡經

道言左右中真結形之始分於元始无上大

道應化之氣空靈瓊胎九萬大劫幽閑寂寂

九萬劫後法當應世結形理炁出於瓊胎出

胎之時九天雷震九地開裂舉步之初登天

寶花身出金光猶如初日二晨俠照晶彩曜

眸背有斗星心前日像綠髮駢齒紫氣連霄

所在之處七素之雲晨夕蔭蓋隱龍圓運以

爲牀座天燈天燭照明雲路天樂天梵萬音

齊鼓龍鳳撫節謠歌太平邕邕和雅晃曜耳

目甘泉甘井飲之愈疾形如金玉无有衰老

无爲和化經九萬劫爾時三真化作嬰童託

附真母已漸長大隨世成立

无上大道元始天尊授此三真號曰至孝真

王治化中國傍攝四夷有生之類咸來受事